



OPINION PUBLICO

Critica riba Gobierno

Exclusion di experto y falta di transparencia den establecimiento di DMH

RECIENTEMENTE, AWEMainta a wordo acerca pa un lector cu reaccionnan indigna relaciona cu e establecimiento di e Departamento pa Mucha y Hoben (DMH) y e presentacion di esaki como e "motor" tras di e Ley di Cuido di Mucha. E critica aki ta regarda e exclusion di profesionalnan experiencia y e falta di transparencia den e proceso di tumamento di decision di gobierno. E ceremonia di dia 1 di november, atendi pa minister-president Evelyn Wever-Croes y minister Rocco Tjon, ta parece segun hopi un intento pa re-posiciona iniciativanan existente sin reconocimiento.

Exclusion di Experticio y Reconocimento

E raiz di e malcontento actual ta sinta den e hecho cu un plataforma existente di expertonan – consistiendo di e Departamentonan di Enseñansa, Salubridad Publico, Asuntonan Social y Husticia – a traha pa añanan largo riba e implementacion di derechonan di mucha na Aruba. E plataforma aki, cu a ricibi elogio internacional pa su contribucion na e Ordenansa Nacional di Cuido di Mucha, ta wordo ignora. Awor, DMH ta wordo presenta como e organo central sin base cla, mientras cu e colaboracion anterior comproba tabata efectivo den su maneho y ehecucion. E cambio aki sin participacion ta lanta duda riba e motibonan tras di e decision di gobierno.

Falta di Transparencia den Tumamento di Decision

Un carta di un persona preocupa involvi ta muestra riba e falta di participacion publico of aprobacion parlamentario den e establecimiento di DMH. Ta parece cu no a tuma luga ningun evaluacion pa determina si un structura nobo tabata necesario of si DMH realmente ta ofrece balor agrega. Esaki ta lanta preguntanan tocante e proceso democratico y e transparencia di gobierno. Ken a tuma e decisionnan aki y a base di cua conseho? Te ainda e preguntanan aki ta keda sin contesta, locual ta aumenta e preocupacionnan tocante motibonan politico.

Preguntanan sin Contesta

Tin preguntanan crucial cu gobierno, y especificamente minister Tjon, no por ignora mas:

Kico ta hustifica e remplazo di un plataforma cu ya caba ta funciona efectivamente pa DMH? Te awor, no ta parece cu tin un evaluacion of raport profundo disponibel cu ta splica e cambio aki. Ken a dicidi pa exclui e expertonan involvi, y pakico no tabatin un discusion publico? Transparencia ta un balor fundamental, specialmente den asuntonan cu ta

regarda muchanan. Con e paso aki ta cuadra cu e promesanan di transparencia y colaboracion den e 'Landspakket'? E establecimiento di DMH ta parece di ta añadiendo un capa burocratico extra, mientras cu structuranan existente tabata funciona adecuadamente.

Un Apelacion riba Gobierno

Si gobierno realmente ta balora transparencia y colaboracion efectivo, manera nan ta pretende, nan mester ta dispuesto pa duna splicacion tocante e cambio di maneho aki. E confiansa den e ehecucion di derechonan di mucha ta depende di e reconocimiento di experticio comproba y comunicacion habri tocante cambionan impactante asina. Te ora cu contestanan cla wordo duna, e impresion ta keda cu consideracionnan politico ta pisa mas cu e bienestar di muchanan. E asunto aki ta demostra e importancia pa tur partido involvi y expertonan wordo reconoci y involvi den maneho. E lector cu a tuma contacto cu AWEMainta ta expresa e preocupacionnan di hopi cu ta puntra nan mes si DMH realmente ta trece un mehoracion of ta simplemente un hugada politico. E bienestar di muchanan no solamente merece atencion, pero tambe e enfoke mas considera y inclusivo posibel.

wingo.com
¿Cómo quieres volar?

Bishita

Medellin, Cali of Bogota

Cu Wingo

RESERVA AWO!
Wingo.com

AUA
AEROPUERTO INTERNACIONAL REINA BEATRIX
www.airportaruba.com